



Uunga siunnersuut: Illuliortiternermut aningaasalersuineq pillugu inatsisip allanngortinnissaa pillugu Inatsisartut Inatsisaat (Tullerriiaarinissamut uppernarsaaneq, sanaartortitsinernut naatsorsuutit, kaaviiartitsinissamut inerteqqut, piffissaq sioqqullugu taarsigassarsianik akiliineq il.il.)
(Ineqarnermut Attaveqaasersuutinullu Naalakkersuisoq)
(Siullermeerneqarnera)

Qujanaq Naalakkersuisut siunnersuummut.

Uagutsinnut Demokraatinut pingaartuuvoq, ullumimiit inuit amerlanerusut pitsaasumik peqqinnartumillu illoqarnissaat ulluinnarni aammalu ilaqutariittut inuunermi patajaattumik sinaakkuteqarnissaat. Tassunga atatillugu ersarissumik isumaqarpugut, sapinngisamik amerlanerpaat inigisartik pigisariaqaraat.

Uani soorunami nammineq illuutip aningaasalersornera isummersuutigissallugu pingaartuuvoq.

Una siunnersuut pitsaasunik arlalinnik imaqarpoq illuutilinnut aammalu pisortanut iluaqutaasussanik. Pitsaaqutinut annertuunut ilaavoq, siunnersuutip erseqqissarmagu, illut pisortanit taarsigassarsiarineqarsimasut ineqarfittuinnat atorneqassasut. Pisortanit taarsigassarsiat namminersorlutik inuusutissarsiuutigalugu suliffeqarfiit imaluunniit sivikitsuinnarmik attartortitsisartut soorlu Airbnb-tut ittut aningaasalersussanngilaat. Erseqqissaanerup taassuma qulakkiissavaa, pisortat aningaasaataasa siunertamut atorneqarnerat, soorlu innuttaasut ataasiakkaat namminneq illuuteqalernissaannut pitsaanerusumik periarfissillugit nammineq inigisamik pigilernissaanut taamaasillunilu Demokraatit, sapinngisamik amerlanerpaat inigisaminnik piginnittuunissaannik anguniagaannut piviusunngortitseqataasumik.

Taamatut oqareerluta, aamma isumaqarpugut, pingaartuuvoq eqqarsaasersuutigissallugu, GrønlandsBANKEN-ip isumakuluuteqarnerata tusaaniarnissaa pisortanit taarsigassarsiat siusinaartumik akilerneqartarnissaannut. Naatsumik oqaatigalugu aningaaserivik isumaqarpoq, siunnersuutigineqartut illunik piginnittut taarsigassarsiatik siusinaarlutik akilertarnissai orniginannginnerulertissagaa tamannalu eqqumaffigineqassasoq.

Demokraatit isumakuluutinut taakkartorneqartunut paasinnipput, siunnersuutigerusullugulu, Naalakkersuisut Sanaartornermut ataatsimiititaliaq suleqatigalugu isumakuluutigineqartut sukumiisumik misissussagaat naliliisoqarnerani, isumakuluutit saqqummiunneqartut siunnersuutip allanngortinneqarneranik malitseqassanersut nalilertariaqassamat.

Sunali tamaat isigalugu aallaavittut isumaqarpugut, siunnersuut siunissami illunik tuniniaanernut ingerlalluarnissamut pitsaasunik tunngavisseeqataajumaartoq.



Siunnersuut taakkuningga oqaaseqaatitalerlugu Sanaartornermut ataatsimiititaliami suliareqqinneqarnissaa innersuussutigineqarpoq.